



Broj/Broj: 03/1-50-1-9-4/07  
Sarajevo/Sarajevo, 29.5.2007. godine

## **Z A P I S N I K**

### **4. sjednice Zajedničke komisije za odbranu i sigurnost BiH Parlamentarne skupštine BiH, održane 29.5.2007, u vremenu od 10 do 12 sati**

Sjednici su prisustvovali članovi Zajedničke komisije: Branko Zrno, Šefik Džaferović, Jozo Križanović, Drago Kalabić, Hazim Rančić, Sulejman Tihić, Slobodan Šaraba, Adem Huskić, Mirko Okolić i Vinko Zorić.

Iz opravdanih razloga sjednici nisu prisustvovali Dušanka Majkić i Ivo Miro Jović.

Sjednici su prisustvovali predstavnici predlagača akata, kao i gosti: Momčilo Novaković, poslanik; Marina Pendeš, zamjenik ministra odbrane BiH; Sifet Podžić, komandant Zajedničkog štaba OSBiH i Rizvo Pleh, generalni inspektor u OSBiH, Savo Beronja, savjetnik predsjedavajućeg Predsjedništva BiH; penzionirani general Hajrudin Grabovica, Rohan Maksvell, šef Odjeljenja za upravljanje tranzicijom, te Jasmin Mekić i Elma Demir iz Štaba NATO-a u BiH; Kristijan Haupt i Dušan Zoler iz Misije OSCE-a u BiH; Dragica Hinić, sekretar Zajedničke komisije za odbranu i sigurnost BiH, i Željko Grubešić, savjetnik u Zajedničkoj komisiji za odbranu i sigurnost BiH.

Sjednici je predsjedavao Branko Zrno.

Za sjednicu je predložen sljedeći

### **DNEVNI RED**

1. Usvajanje Zapisnika 3. sjednice Zajedničke komisije;
2. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Slobodan Šaraba);
3. Razmatranje Odluke o utvrđivanju kandidata za generalske pozicije u Oružanim snagama BiH (predlagač: Predsjedništvo BiH);
4. Razmatranje zahtjeva general-majora Hajrudina Grabovice;
5. Tekuća pitanja:
  - a) Izvještaj s radionice, održane u Neumu, o temi: „Zakonodavni okvir, nadležnosti i planovi institucija BiH u oblasti odbrane i sigurnosti“, 19. i 20.4.2007.godine;
  - b) Izvještaj o posjeti Glavnom uredu Granične policije BiH i Terenskom uredu GP u Višegradu;
  - c) Dopis Beriza Belkića, predsjedavajućeg Predstavničkog doma PSBiH, po zahtjevu advokata Faruka Balijagića;

- d) Informacija o sigurnosnoj provjeri;
- e) Poziv za posjetu PSOTC Butmir;
- f) Informacija o posjeti Parlamentu SR Njemačke;
- g) Inicijativa za dodjelu počasnog državljanstva BiH i produženje rada u Misiji OSCE-a u BiH za Christiana Haupta.

Na prijedlog Slobodana Šarabe, jednog od predlagača Zakona iz tačke 2. predloženog dnevnog reda, članovi Zajedničke komisije jednoglasno su odlučili skinuti s dnevnog reda ovu tačku do naredne sjednice Komisije, do kada bi trebalo da dobiju mišljenje Vlade RS-a o ovom zakonu. Ovako izmijenjen dnevni red članovi Zajedničke komisije jednoglasno su usvojili.

### **Ad. 1. Usvajanje Zapisnika 3. sjednice Zajedničke komisije**

Zapsinik 3. sjednice članovi Zajedničke komisije jednoglasno su usvojili.

### **Ad. 2. Razmatranje Odluke o utvrđivanju kandidata za generalske pozicije u Oružanim snagama BiH (predlagač:Predsjedništvo BiH)**

**Marina Pendeš** obrazložila je Odluku Predsjedništva BiH o utvrđivanju kandidata za generalske pozicije u Oružanim snagama BiH. Istaknula je da je Odluka donesena na osnovu odredbi Zakona o odbrani BiH i Zakona o službi u Oružanim snagama BiH, te da je za sve kandidate NATO izvršio provjeru i dao privremenu saglasnost za imenovanje.

Nakon kraće rasprave članovi Zajedničke komisije jednoglasno su podržali Odluku Predsjedništva BiH i uputili je u daljnju parlamentarnu proceduru s prijedlogom za njeno potvrđivanje.

### **Ad. 3. Razmatranje zahtjeva general-majora Hajrudina Grabovice**

**Branko Zrno** podsjetio je prisutne da je na prethodnoj sjednici Zajedničke komisije razmatrano pismo penzioniranog generala Hajrudina Grabovice o načinu njegovog odlaska u penziju, te da je tada usvojen zaključak da se general Grabovica pozove na narednu sjednicu Zajedničke komisije, ako želi, i tom prilikom odgovori da li ostaje pri datim navodima u pismu i time zahtijeva da Zajednička komisija nastavi proceduru po tom aktu. Naglasio je da je Zajednička komisija u ovom slučaju u specifičnom položaju s obzirom da se ne može mijenjati donesena odluka Predsjedništva BiH o penzioniranju, ali da je željela omogućiti generalu, čije imenovanje je i potvrđivala, da se obrati i kaže ono što smatra potrebnim.

Potom je dao riječ penzioniranom generalu **Hajrudinu Grabovici** koji je zahvalio Komisiji na pozivu i mogućnosti da obrazloži svoj zahtjev. Naglasio je da je zahtjev napisao prije zvaničnog penzioniranja, odnosno donošenja odluke Predsjedništva BiH kojim se on na vlastiti zahtjev upućuje u starosnu penziju, te da trenutno nema nikakvih primjedbi na takvu odluku. Odnosi s Predsjedništvom BiH su korektni i on u potpunosti poštuje njihovu odluku. Razlog za upućivanje njegovog pisma leži, prije svega, u moralnom blaćenju njegove ličnosti u sredstvima informiranja i prisustvo ovoj sjednici Komisije predstavlja za njega određenu moralnu satisfakciju. Nakon toga dao je određena pojašnjenja postupaka, odnosno istrage koja je vođena protiv njega u Generalnom inspektoratu OSBiH o upotrebi jedinica Vojske FBiH na teritoriji RS-a, u Rogatici. Naglasio je da je ta istraga rezultirala s dvije različite verzije zaključaka. Sve druge istrage koje su vođene nisu tačne i nema dokaza za njihovu opravdanost. Tokom istraga on je sve vrijeme zahtijevao od ministra odbrane BiH i načelnika Zajedničkog štaba BiH da mu omoguće direktni kontakt i razgovor s glavnokomandujućim NATO-a u BiH i EUFOR-a, ali mu to nije omogućeno.

**Sifet Podžić** istakao je da je ovaj proces trajao dugo, a da je Ministarstvo odbrane BiH cijeli potupak uradilo i završilo u skladu sa zakonskim odredbama. Što se tiče konkretne istrage koju je

spomenuo general Grabovica, naglasio je da je ona vođena na zahtjev NATO-a, koji je baziran na Uputstvu snagama NATO-a. U vezi s navodima da generalu Grabovici nije omogućen neposredan razgovor s komandantom NATO-a, istaknuo je da oni nisu tačni, te da je taj sastanak omogućen s generalom Vajtmanom. Potom je detaljno obrazložio istrage vođene protiv generala Grabovice, čija je hronologija dostavljena i u pisanoj formi članovima Komisije.

Na datu hronologiju istraga general Grabovica nije imao primjedbi, osim na kontradiktornost zaključaka istrage u vezi s upotrebom jedinice Vojske FBiH u Rogatici. U vezi s prethodnim povlačenjem svog zahtjeva za penzioniranje, istaknuo je da je tada podnio zahtjev da se penzionira zaključno s 1.10.2006. godine, što bi mu omogućilo povoljniju penzijsku osnovicu, ali tom zahtjevu nije udovoljeno.

**Vinko Zorić** izrazio je nezadovoljstvo raspravom o ovoj tački, s obzirom da se uopće ne zna koji je i da li postoji konkretan zahtjev generala Grabovice.

**Sulejman Tihić** postavio je pitanje uloge savjetnika predsjedavajućeg Predsjedništva BiH u kontekstu novog Zakona o odbrani BiH, s obzirom da je vojni savjetnik Predsjedništva BiH sada načelnik Zajedničkog štaba OSBiH. Imajući u vidu konkretan slučaj, naglasio je da je o njemu i ranije bio upoznat kao član Predsjedništva BiH, te da je razgovarao u nekoliko navrata s glavnokomandujućim NATO-a o ovom slučaju. U svakom slučaju, nije mu bilo jasno da li je general Grabovica kriv ili ne. To je bio početak tranzicije u oblasti odbrane, a glavni autoritet u toj oblasti i u donošenju odluka bio je, kao što je i sada, NATO. U međuvremenu je general Grabovica penzioniran na vlastiti zahtjev, a ne zbog propusta. Raznih pisanja u štampi uvijek će biti i na to Zajednička komisija ne može uticati. Zato bi cijeli ovaj slučaj trebalo okončati radi višeg cilja kojemu idemo, a to je ulazak BiH u NATO.

**Šefik Džaferović** naglasio je ulogu Zajedničke komisije u procesu imenovanja generala, ali i u ovakvim slučajevima, kada se generalima želi omogućiti da kažu što žele. Potom je dodao da se u potpunosti slaže s mišljenjem Sulejmana Tihića.

**Adem Huskić** naglasio je da je ova rasprava bila potrebna i da je ovo dobra praksa u radu Zajedničke komisije, te da u konkretnom slučaju ne treba niko biti dobitnik ili gubitnik.

**Savo Beronja** odgovorio je na pitanje Sulejmana Tihića. Istakao je da je u skladu sa Zakonom o odbrani BiH, načelnik ZŠOSBiH vojni savjetnik Predsjedništva BiH, te da se on na ovoj sjednici ne nalazi u toj ulozi. U konsultacijama Predsjedništva BiH s Ministarstvom odbrane BiH konstatirano je da često postoje određena politička pitanja, te je dogovoreno da sjednicama Komisije prisustvuje uvijek predstavnik Ministarstva odbrane BiH i jedan savjetnik članova Predsjedništva BiH, s tim da se to prisustvo ravnomjerno rasporedi na savjetnike iz sva tri naroda.

**Drago Kalabić** istakao je da je razmatranje ove tačke dnevnog reda dogovoreno radi utvrđivanja istinitosti navoda datih u dopisu generala Grabovice da je penzioniran pod prijetnjama i pritiskom. Međutim, general Grabovica ga na ovoj sjednici nije ubijedio da su ti navodi tačni, jer je u dogovoru s nadležnim konačno riješio svoj status. Kako se ubuduće ne bi vodila dugotrajna bespotrebna rasprava na Zajedničkoj komisiji, predložio je da postoji eventualno predfaza razgovora rukovodstva Komisije za podnosiocem zahtjeva. Tek ako nakon te faze bude potrebno, zahtjeve bi razmatrala cijela Zajednička komisija. Potom je predložio da se zahtjev generala Grabovice odbije, te da se konstatira da je penzioniran u skladu sa zakonskim odredbama.

**Jozo Križanović** smatra da je rasprava o ovom slučaju bila korisna, te da je u nadležnosti naše komisije vršenje nadzora nad OSBiH. Mišljenja je da je general Grabovica u konkretnom slučaju časno penzioniran, jer je demantirao određene navode, ali da je i Ministarstvo odbrane BiH dijelom u pravu. Potom je istaknuo mišljenje da na ovoj sjednici vjerovatno nisu navedeni pravi razlozi, te da se u ovom slučaju najvjerovatnije može naslutiti inferioran odnos Ministarstva odbrane BiH i OSBiH prema NATO-u i EUFOR-u.

**Sulejman Tihić** predložio je zaključak kojim Zajednička komisija prima k znanju informacije i konstatira da je odlukom Predsjedništva BiH general Grabovica upućen časno u starosnu penziju.

**Marina Pendeš** predložila je da se navedeni zaključak dopuni konstatacijom da su Ministarstvo odbrane BiH, Zajednički štab BiH i Generalni inspektorat OSBiH postupali u skladu sa Zakonom o odbrani BiH i uputstvom ministra odbrane.

U ponovljenom nezadovoljstvu raspravom o ovoj tački dnevnog reda, **Vinko Zorić** predložio je se prihvatiti zahtjev generala Grabovice, kojeg, prema konstataciji predsjedavajućeg Zajedničke komisije, i nema.

Članovi Zajedničke komisije izjasnili su se o prijedlogu zaključka koji je formulirao Sulejman Tihiić. Ovaj prijedlog zaključka nije usvojen jer je „za“ usvajanje glasalo šest članova, dok su četiri člana bila „suzdržana“. U skladu s odredbama poslovnika domova, ukupna većina sadržala je po tri glasa „za“ članova Komisije iz oba doma, ali nije uključila tražene glasove iz sva tri konstitutivna naroda (bez glasa „za“ predstavnika srpskog naroda).

**Branko Zrno** izrazio je nezadovoljstvo postojećom situacijom, s obzirom da se u konkretnom slučaju radi o situaciji u kojoj se ne može ništa promijeniti. Zato bi, eventualno, trebalo ponovo formulirati zaključak i o njemu se izjasniti.

**General Grabovica** ponovio je da on sada nema konkretnog zahtjeva.

**Drago Kalabić** predložio je zaključak kojim se konstatira da nema osnova za postupanje po zahtjevu generala Grabovice, te da su u konkretnom slučaju nadležni organi proveli postupak u skladu sa zakonom.

**Sulejman Tihiić** rekao je da smatra da je prijedlog zaključka koji je on dao fleksibilniji.

Na prijedlog ostalih članova Komisije, i nakon dopune tekstom o zakonitom postupanju organa, u ponovljenom glasanju, **zaključak** koji je predložio Sulejman Tihiić jednoglasno je usvojen, u sljedećem tekstu:

„Zajednička komisija prima k znanju informacije date u slučaju penzioniranja generala Hajrudina Grabovice, te konstatira da je, u skladu sa zakonom, Odlukom Predsjedništva BiH, general Grabovica upućen časno u starosnu penziju.

#### **Ad.4. Tekuća pitanja**

- a) Izvještaj s radionice, održane u Neumu, o temi: „Zakonodavni okvir, nadležnosti i planovi institucija BiH u oblasti odbrane i sigurnosti“, 19. i 20. 4.2007.godine;**
- b) Izvještaj o posjeti Glavnom uredu Granične policije BiH i Terenskom uredu GP u Višegradu**

O obje navadene tačke vođena je jedinstvena rasprava.

**Adem Huskić** potencirao je probleme koji su istaknuti tokom posjete sjedištu Granične policije BiH i Terenskom uredu u Višegradu, kao što je, prije svega, nedostatak kadra. Predložio je da Zajednička komisija donese zaključak kojim bi se od Vijeća ministara BiH i Ministarstva sigurnosti BiH tražilo da osiguraju zapošljavanje povratnika u Graničnu policiju čime bi se postigao i nacionalni balans, te da se riješi pitanje gazdovanja graničnim prijelazima.

**Šefik Džaferović** istakao je da je Zajednička komisija prilikom posjete Graničnoj policiji sagledala probleme s kojima se suočavaju, te tom prilikom zatražila od rukovodstva ove institucije da sva neriješena pitanja i prijedlog za njihovo rješavanje dostave Komisiji u formi kompletne informacije. Smatra da na današnjoj sjednici ne bi trebalo usvajati zaključke, nego od Granične policije ponovo zatražiti da dostavi kompletnu informaciju o problemima s prijedlogom njihovog rješavanja. Nakon dostave te informacije o kojoj bi Zajednička komisija obavila posebnu raspravu, donijeli bi određene zaključke koje bi potom uputili domovima Parlamentarne skupštine BiH na raspravu. Ovakav način rada osnažio bi predložene zaključke, a odnosio bi se i na druge institucije iz oblasti sigurnosti, s obzirom da će se naša komisija u narednom periodu sve više baviti ovim pitanjima koja spadaju u oblast parlamentarnog nadzora. U tom kontekstu naveo je i primjer ranije donesenog zaključka kojim je zatraženo rješavanje pitanja predstavnika NBC Interpola BiH u Lionu, koji do danas nije realiziran.

S navedenim mišljenjem Šefika Džaferovića saglasili su se i **Slobodan Šaraba i Mirko Okolić**, naglasivši potrebu realizacije usvojenih zaključaka.

**Vinko Zorić** također je podržao navedeni prijedlog i predložio sljedeći **zaključak**:

„Povodom navedenih tačaka dnevnog reda, Zajednička komisija konstatira da je raspravljala o njima, podržala ih, te zaključila da je neophodno pribaviti dodatne informacije o pitanjima i problemima iz domena rada Granične policije BiH, kao i drugih sigurnosnih struktura u BiH, kako bi potom bila organizirana tematska sjednica Zajedničke komisije i prijedlozi njenih zaključaka upućeni u daljnju parlamentarnu proceduru.“

Navedeni prijedlog zaključka članovi Zajedničke komisije jednoglasno su usvojili.

**c) Dopis Beriza Belkića, predsjedavajućeg Predstavničkog doma PSBiH, po zahtjevu advokata Faruka Balijagića**

Povodom dopisa Beriza Belkića, predsjedavajućeg Predstavničkog doma PSBiH, koji je po zahtjevu advokata Faruka Balijagića upućen Zajedničkoj komisiji, članovi Komisije jednoglasno su usvojili **zaključak**:

„Za razmatranje navoda iz navedog akta, a po pojedinačnim pritužbama, nije nadležna Zajednička komisija za odbranu i sigurnost BiH, kao radno tijelo Parlamentarne skupštine BiH, koje inače razmatra pitanje rada sigurnosnih struktura, ali prema utvrđenim pravilima. Stoga predmetni dopis, ukoliko to smatra potrebnim, predsjedavajući Predstavničkog doma PSBiH može proslijediti drugim nadležnim institucijama i tijelima vlasti, kao što su OSA, Tužilaštvo BiH, nadležno ministarstvo i Vijeće ministara BiH. „

**d) Informacija o sigurnosnoj provjeri**

**Dragica Hinić** informirala je prisutne o sigurnosnoj provjeri koja će biti obavljena u skladu sa Zakonom o zaštiti tajnih podataka BiH, kao i Sigurnosnim sporazumom s NATO-om.

Svi prateći akti uz navedeni zakon i potrebni obrasci bit će brzo završeni, tako da će članovi Zajedničke komisije biti blagovremeno informirani, a bit će im osigurana i pomoć za popunjavanje obrazaca, ako to bude potrebno.

**e) Poziv za posjetu PSOTC Butmir**

**Željko Grubešić** informirao je prisutne o pozivu komandanta PSOTC Butmir upućenom Zajedničkoj komisiji da posjeti ovaj centar 6.juna 2007. godine u jutarnjim satima. Posjeta bi bila iskorištena za prezentaciju rada i uloge PSOTC, kao i razmjenu mišljenja. Prijevoz do Butmira osigurat će Misija OSCE-a u BiH.

Članovi Zajedničke komisije jednoglasno su prihvatili poziv.

**f) Informacija o posjeti Parlamentu SR Njemačke**

**Christian Haupt** informirao je prisutne o postojanju tehničkih poteškoća u realizaciji posjete Zajedničke komisije Parlamentu SR Njemačke. Njemačka je odobrila sredstva za ovu posjetu, ali je prilično kompliciran njihov prijenos na Misiju OSCE-a u BiH. Taj proces zahtijeva mnogo vremena, te zato ne zna tačno kada će ova posjeta biti realizirana.

**g) Inicijative za dodjelu počasnog državljanstva BiH i produženje rada u Misiji OSCE-a u BiH za Christiana Haupta**

**Dragica Hinić** obrazložila je inicijative za dodjelu počasnog državljanstva BiH i produženje rada u Misiji OSCE-a u BiH za Christiana Haupta. Prvu inicijativu za gosp. Haupta, koji svojim radom i zalaganjem to zaslužuje, Zajednička komisija uputila bi kolegijima oba doma PSBiH, koji bi je

potom prosljedili Vijeću ministara BiH, nadležnom za dodjelu počesnog državljanstva, dok bi drugu inicijativu uputili nadležnim organizacijama, institucijama i zvaničnicima OSCE-a i Ambasade SR Njemačke.

Navedene inicijative članovi Zajedničke komisije jednoglasno su usvojili.

Zapisnik sačinila  
**Dragica Hinić**

Predsjedavajući  
Zajedničke komisije  
**Branko Zrno**